

Wasika-à BITRUS Ba Sig Wà Wa Zyun

Bitrus ba sig wasika-à níng jirà aku dang gbam pìkyinn mpìrká yam gàfinn sig á jir shwìn-à big ya sig big á dò shinn Kristi. Ku dinya big rag abig bir pìkyinn á shinn barà Yesu wu n dù nann zu kàng rìhing ma yonki, ma barà Yesu má kàng bi á dunyaru. Shwìnká big ri wa níng, àyúnn-à Yesu Kristi ma kàng bi hing, Shìdun má ya kó ni lada.

¹ Mì Bitrus wùn aswam Yesu Kristi, mì ri ba ya ning mpìrká zyun-à Shìdun shig zu sig, ning yag sig àràg í kyinn n yam sig awín awín mà Pantas, Galatiya, Kapadokiya, Asiya, ma Bitiniya.

² Shìdun Tayí shig zu sig ning tun sai-à á ninonn. Ku yì hing rag ná shi yannká buwá. Ku sinn kà Awunwá á kyinn ná ni, Awunwá sa ning ri shi shu kyìkyà, jirà aning wib Yesu Kristi ma aku tu kyàr ning ma àsàwá.

Asàn Shìdun ma pìkyinn na tag abig kà mònn á pìkyinn ná ni.

Pìkyinn Bir Zyun-à Má Vinn Fig á Vinn Bàna

³ Ayi swam yan Shìdun zyun-à í Ta Shinn Luyí Yesu Kristi jir shinn barà ku myàng sig ashiyí wàni, n ya sig yi yonki àpyú á jir shinn barà Yesu dù nann zu kàng sig ma yonki mà amir-à ni níng. A jir wàníng ni, yi ri kyab rag yá dìg bu-à òsàn.

⁴ Tàma-à níng yì ri shì kir yonki àpyú zyun-à Shìdun gib sig nu rag kwá ya yì mà wai. Kwá sa sà'n ya yì bu nìnànn nímá. Bu-à kwá sa ya yì níng, má swàr fig bàna, má bai fig bàna tinn.

⁵ Bigné, níng ká ri bir pìkyinn, gbam Shìdun shì sig á shinn ná ni, ku ri myàng kwonn ma níng hár àyúnn-à wà kinn shinn, kwá zìg zu níng.

⁶ Wàníng í bu-à sa níng ri fig àjwár tàma-à níng, kó barà níng ri wa shwìn kim kim su títi nímá.

⁷ Bu-à big ri zìm bàna, big ri zìm abig yì rag pìkyinn birná í àjai. Zinariya zyun-à ma bai rìg níng má, big ri màg màg fig ma pyìr. Pìkyinn birná zyun-à níng bir sig, wà sà'n kab sig zinariya níng, í barà bá màg màg fig ku áni jirà abig myàng wà níng ma ri bir pìkyinn àjai. Wà ma àdòníng Yesu Kristi má swam yan níng má sìnning mpìr ùwài àyúnn-à kwá kàng bì áni.

⁸ Kó barà níng myàng fig ku ma zuná bàna níng, níng ri zìm ku. Níng ri bir pìkyinn ná á byarwá ni, kó barà níng myàng fig ma ku bàna níng. Wàníng í bu-à sa níng ri fig àjwár wàni, àjwár-à hi kab sig gbam wà dí dang,

⁹ jir kai bàna á jir shinn pìkyinn birná ni, Shìdun pinn zu rìghing níng.

¹⁰ Sai-à rì níng mpìrká rìi dang kyann jir Shìdun níng, big dang sig jír á shinn àsàn-à Shìdun dang sig rag kwá ya níng. Big yàn barà bá yì byann jír á shinn àsàn-à má bì á byarná ni níng.

¹¹ Big ri zìm abig yì sai-à àyúnn-à hi má sa, ma barà bu-à hi má sa áni. Wàníng í sai-à Awun

Yesu Kristi ri tìya big írì shwìn-à Yesu má wa ma àjwár zyun-à má bi ásim.

¹² Shìdun tìya byann big rag swàm zyun-à big ri sa níng, big ri sa fíg jir shinnbá bàna, ama í jir shinn ná, àràg barà big dang sig á shinn buká zyun-à ning fig sig mà byar yann aswamká. Big dang sig jir òsàn á shinn gbam Awun Kyìkyàr zyun-à bi sig mà wai. Bu káníng bidim pár yann aswam Shìdun mà wai ri zìm abig yì byann.

Aning Shi Shu Pìkyinn-à Kyìkyàr

¹³ Aning sa shiri wà ná sa swàm Shìdun. Aning shi ázír ma aning bir pìkyinn ná á shinn àsàn-à ná díg sai-à Yesu Kristi má bi.

¹⁴ Aning wib Shìdun, kada aning zìm abann bu zyun aku tonn gban ning àràg á sai-à ning rì yì fig bu zyun bàna níng.

¹⁵ Barà ku zyun-à bar sig ning shi sig shu ma pìkyinn-à kyìkyàr níng, ning má aning shi shu pìkyinn-à kyìkyàr á buká zyun-à na sa bidim pár.

¹⁶ Jir Shìdun dang sig rag, “Aning shi shu pìkyinn-à kyìkyàr, jir kai bàna mì í Shìdun pìkyinn-à kyìkyàr.”

¹⁷ Ning ri bar ku Taná á sai-à ning ri vig ku, ku zyun-à ri wà kwonn swàm mpìrká bidim pár ábibir. Aning shi shu kyinn ná ma zinn, aning wib Shìdun,

¹⁸ jir kai bàna ning yì hing bu-à big wa sig jirà abig zìg zu ning á byar bu-à bibaiká zyun-à shi sig á vù yàkúká buyí big. Buká zyun-à zìg zu sig ning níng, í bu-à má bai fig ábai bàna, àràg azurfa kó zinariya,

¹⁹ ama ku zìg zu ning ma àsà kyìkyàr bu Kristi zyun-à mpìr má wann sar fig bàna. Kristi shi sig àràg wùn àdùn zyun-à sa fig bu-à bibai bàna.

²⁰ Shìdun shig zu sig ku tun sai-à big mà màm fig ma dunyaru bàna. Ama barà dunyaru nyàan vinn tàma-à níng, ku bi n tìya big òrìwá dò jir shinn ná.

²¹ I dò jir shinnwá, ning bir sig pìkyinn ná á byar Shìdun zyun-à gbar dù nann zu sig ku mà amir ki-à ni, n ya ku àgbam. I bu-à sa ning bir sig pìkyinn ná á byar Shìdun, mi ri sinn zuná á bu-à Shìdun má ya ning.

²² Barà ning wib sig jír àjai-à níng, ning sa kyàr rìghing shinn ná, ning zìm rìghing jàuná. Aning zìm bar òrìná ma pìkyinn nzyun.

²³ Barà Shìdun mà kàng rìghing ning níng, ning shi fig rag àràg yanká zyun-à tabá má wu níng bàna. Ning òg sig yonki zyun-à má vinn fig ávinn bàna á byar jir Shìdun zyun-à kinn kinn.

²⁴ Jir Shìdun dang sig rag,
 “Mpìr jíkwìnn bidìm pàr shi sig àràg í byann.
 Nsònnbá shi sig àràg í awu byann,
 byann-à ma wim hing, awu-à í jwag kìfinn rìg-à.

²⁵ Ama jir Shìdun shi sig hár kinn kinn.”
 Jír-à níng, í jir àjwár zyun-à big rì dinya sig ning.

2

Shìdun Shig Zu Sig Ning Jirà Aning Shi Mpìrká Buwá

¹ Kada aning sa rag bu-à bibai bàna, aning tonn gban mpìr bàna, aning gbar dù nann zu shinn

bàna, aning sa akyib bàna, ma aning bònn swau mpìr bàna tinn.

² Barà wùn àjann ri zìm myann nàwá níng, níng má aning zìm jir Shìdun àdòníng tinn, jirà aning yì swàb kà jírwá ma aning wìm zu.

³ Tàma-à níng, níng màg màg fig hing ma shinn ná, níng yì hing rag Shinn Luyí sànn hing.

⁴ Aning bi á byar abàn zyun-à shi sig ma yonki, wà zyun-à í Shinn Luyí níng. Abàn-à níng hi mpìrká ngàng ku, ku í wà sàsàn zyun-à Shìdun shig zu sig ku.

⁵ Ning má, níng shi sig àràg í abàn-à shi sig ma yonki. Ning shi sig lu-à Awun Shìdun mi sig. Aning shi àràg mpìrká zyun-à ri twìb swànn bu á pyànn Shìdun. Aning shi mpìr kyìkyàr ká má twìb swànn bu wà zyun-à Shìdun má zig bu twìb swànn ná á dò jir shinn Yesu Kristi.

⁶ Jir Shìdun dang sig rag,
“N shig zu rìghing abàn òsàn zyun-à mì ri zìm wàni.

Má sìn abàn-à hi mà kur tonn-à ni mà Siyona. Mpìr-à ma ya hing gwangga á byarwá ni, kwá fig fig àzunái bàna.”

⁷ Abàn-à níng í bu ùwài á byar mpìrká zyun-à ya sig gwangga á byarwá ni. Ká zyun-à ya fig gwangga bàna níng, má shi àràg barà jir Shìdun dang sig rag,

“Abàn zyun-à ami buká ngàng sig níng, kab síg nì kó kai bidim pár.”

⁸ Jir Shìdun dang jakàng n rag,
“Abàn-à níng má sa mpìrká káhi àsiu má ta big, hár bá kù.”

Asiù-à níng ta sig, jir kai bàna big ngàng wà bá ya gwangga á jir Shìdun. Wàníng í bu-à Shìdun ri zìm aku sa ya big.

⁹ Ama buná Shìdun shig zu rìghing ning, ning shi sig kyau mpìr atwìb swànn bu á pyànn Shìdun. Níng shi sig mpìr kyìkyàrká bu Shìdun, jirà aning dinya mpìrká jir Shìdun barà ku zìg zu rìghing ning mà zufi-à ni, tàma-à níng ning shi sig rag á byar yiyar-à ni.

¹⁰ Sai-à rì níng, níng í mpìr Shìdun bàna, ama tàma-à níng, níng í mpìrwá. Sai-à rì níng, níng ri yì fig rag Shìdun ri myàng ashiná bàna. Ama tàma-à níng, níng yì hing wà ku ri myàng ashiná.

Níng í Fàu Shìdun

¹¹ Jàumí big, ning bi síg kyìnn á dunyarù-à níng ni. Bu bibaiká òrná ri zìm níng, ri nu kànn ma bu òsànká pìkyinn ná ri zìm. Kada aning zìm aning sa bu-à bibai bàna.

¹² Aning shi shu òsàn á byar mpìrká zyun-à yì fig jir Shìdun bàna. Kó ba swau ning shí má, bá myàng swàm òsàn ná àyúnn-à Shìdun má wà kwonn mpìrká.

¹³ A jir shinn Shinn Luyí aning fig jir àgbamká bu-à ba dinya ning, kó kùr ana swann-à,

¹⁴ kó àgbam jànnká ma àgbamká buná bidim pár, ká zyun-à Shìdun sìnn kà sig big abig ya mpìrká ri sa bu-à bibai níng shwìn, ma abig swam yan ká ri sa bu òsàn níng.

¹⁵ Shìdun ri zìm aning sa bu-à òsàn jirà kada mpìrká abig dang jír-à bàna ma yìr á shinn ná ni bàna.

¹⁶ Aning shi shu shinn ná, kada shu shinn ná aku sa aning sa bu-à bibai bàna, aning shi àràng í fàu Shìdun.

¹⁷ Aning wib kó ni bidim pá, aning zìm ba òrná, ning ká ri bàg Yesu, aning wib Shìdun ma aning wib kùr-à ana swann.

¹⁸ Ning fàuká, aning fig jir àsàin luná, ma aning wib big. Kada aning wib íri mpìr òsànká bàna, ama ma ká zyun-à pìkyinnbá bai tinn.

¹⁹ Shìdun má sa sà n ya ning, wà na tib hing pìkyinn ná á shwìn-à ning wa sig á jir shinnwá ni.

²⁰ Wà mpìrká ma dab ning á jir shinn bu-à bibai-à ning sa sig, ná òg fig lada bàna, ama wà mpìrká ma dab ning á ò jir shinn bu òsà-à ning sa sig, Shìdun má ya ning lada.

²¹ Wàning í bu-à sa Shìdun bar sig ning, jir kai bàna Kristi ma shinnwá má, ku wa hing shwìn á jir shinn ná ni. Ku tiya sig ning gbìb barà ná bàg áni àràng barà ku bàg sig.

²² Ku sa fig bu pyìr bàna, ku ri gim fig òsàng á nuwá ni bàna.

²³ Mpìrká swau ku shí, ku swau pyann kàng fig big bàna. Ku wa shwìn, ku sa pyann kàng fig bàna, ama ku bir pìkyinnwá á byar Shìdun àsàin-à ri wà kwonn á gbìb àjai.

²⁴ Sai-à Kristi rii wa shwìn mà atàm bín-à ni, ku zìg gban rìghing bu pyìrká buyí á òrwá ni, àjirà kada ayi sa bu pyìr bàna, sái bu-à òsàn. A jir shinn shwìn-à ku wa sig níng í bu-à sa ning òg sig yonki.

²⁵ Ning rì shi sig àràng àdùnká zyun-à nang jànn sig gbìb, ama tàma-à níng ning kàng bi rìghing

á byar á nuná ni. Ku í àsàin-à ri myàng kwonn ma yonkiná tinn.

3

Barà Wunù Ma Wàwá Má Shi Shu

¹ Uwàkà, aning wib jir nùnà, jir kai bàna kó áyaubá ni, wà ba wib fig jir Shìdun bàna, shuná má tiya big abig bir pìkyinn á byar Shìdun, kó wà na dang fig ma nu bàna.

² Nùnà má myàng íri shu kyìkyàr-à ning shi sig. Bá myàng barà ning ri wib Shìdun.

³ Kada aning myàng íri nsònn jinn ná, ma zinariya-à ning ri pag níng bàna, kó jir já òsànká ning ri wìr níng bàna.

⁴ Ama nsònn ná aku shi á pìkyinn ná ni, nsònn pìkyinn ajun. Nsònn-à hi má jànn fig bàna, í zyun-à Shìdun ri zìm wàni.

⁵ Wàníng í barà uwàkà wàri shi sig áni, big ri bir pìkyinnbá á byar Shìdun, mi ri sèng òirbá, mi ri wib jir nùbá,

⁶ àràg barà Saratu fig jir nùwá Ibrahim n bar wàníng rag shinn luwá. Wà ning ma ri sa bu-à òsàn, ma shàr fig zinn bàna, ning shi sig yanká bu Saratu tàma-à níng.

⁷ Ning wunùkà, aning shi shu òsàn ma wàkà buná big, aning wib big. Gbambá fòr fig àràg bu ning wunùkà bàna. Ama Shìdun ri sa sà ya big àràg barà ku ri sa sà ya ning, àsàn zyun-à ri ya yonki. Aning sa àdòníng jirà wà na vig hing Shìdun, aku fig ning.

Shwìn á Shinn Bu-à Nsàn

⁸ To. Ning bidim pár aning shi shu òsàn ábìr-à ni. Aning myàng ashi jàuná, aning zìm jàuná, jir kai bàna Taná í ñzyun, aning sa ya big bu òsàn. Aning sinn kàng shinn ná àràg í wùnshái.

⁹ Kada aning sa pyann kàng mpìr-à ma sa ning bu-à bibai bàna, kada aning swau kàng mpìr-à ma swau sig ning shí bàna. Mpìr-à ma sa sig ning bu káníng bidim pár, aning sa sà̀n ya big. Bu-à sa Shìdun bar sig ning níng, ku bar síg ning jirà aku sa sà̀n ya ning.

¹⁰ Jir Shìdun dang sig rag,
 “Mpìr-à ma ri zìm aku shi shu òsàn
 ma aku fig àjwár
 kó ákaun bidim pár,
 sái aku fim jír-à bibai dang ma òsáng gim.

¹¹ Aku fim bu-à bibaiká, aku shi sa íri bu-à òsàn. Aku zìm shu ajun ma kó ni bidim pár.

¹² Shinn Luyí ri myàng mpìr òsànká,
 ku ri fig bu-à big ri vig ku.

Ku ri zib mpìrká zyun-à ri sa bu-à bibai.”

¹³ I ni ma sa ning nì bu-à bibai wà ning ma ri sa àtùtwài barà ná sa bu-à òsàn rà?

¹⁴ Wà ning ma ri wa shwìn á shinn bu-à òsàn, aning fig àjwár. Kada aning shà̀r zinn mpìr bàna, aning kyab bu zyun bàna tinn.

¹⁵ Aning wib Yesu Kristi á pìkyinn ná ni, ku zyun-à ku í Shinn Luná. Aning shi ma shiri barà kó ni ma bib ning abib, ná dinya byann big bu-à sa ning bir sig pìkyinn á byar Shìdun ni.

¹⁶ Aning zìm ya big ádàn-à ma aning wib mpìrká. Pìkyinn ná aku shi ákyà̀r ma kó ni bidim pár, àjirà wà mpìrká ma swau ning shí, ma dang

bai ning á jir shinn Yesu Kristi, abig fig àzunái á jírba ní.

¹⁷ Wà Shìdun ma zìm síg nì, wà ning ma ri wa shwìn á shinn bu-à òsàn ning ri sa, ná òg lada. Ama wà ning ma ri wa shwìn á jir bu bibai-à ning ri sa, ná òg fig lada bàna.

¹⁸ Yesu Kristi ma shinnwá wu ki í kàun nzyun. Kó barà ku sa fig bu pyìr bàna níng, ku wu sig á jir shinn mpìr bu pyìrká ni bidìm pàr. Ku wu sig àjirà aku zìg yag yi á pyànn Shìdun. Big gban rìg wi òrwa, ama ku dù nann zu kàng ma òr àpyú,

¹⁹ ku yag n dinya adìn mpìrká zyun-à wu sig, big kig sig big mà tonn fi-à ni níng, jir Shìdun.

²⁰ Káníng í adìn mpìrká zyun-à rì wib fig Shìdun bàna á sai-à ku ri tib pìkyinnwá mi ri shi kir big, sai-à Nuhu rì dàb kòr-à níng. A sai-à Nuhu rì dàb kòr-à níng mpìr awinyinká zyun-à shi kà sig mà kòr-à ni níng big wìm zu rìghing á zàpìr-à ni.

²¹ Zàpìr-à hi shi sig àràg í batisma zyun-à tàma-à níng zìg zu sig ning níng. Batisma shi fig àràg barà yi ri wau kyàr òr jínyí bàna. Batisma shi sig àràg mpìr gíb síg nu ma Shìdun ma pìkyinn òsàn. Batisma ri tàg yi rag yi wìm zu rìghing á jir barà Yesu dù nann zu sig ma yonki.

²² Tàma-à níng Yesu nann yag rìghing mà wai, ku shi sig mà agunn wìm nu Shìdun. Ku ri na kùr á shinn yann aswamká ni mà wai, ma mpìr àgbamká mà wai, ma kó kai bidìm pàr.

Aning Shi Shuná Aràg Barà Shìdun Ri Zìm

¹ Yesu Kristi wa hing shwìn á dò jir shinnyí ni, á sai-à ku rì shi sig á dunyaru. Ning má, aning tib pìkyinn ná, ma aning kyab jir bu-à Yesu sa sig, jir kai bàna mpìr-à ma wa hing shwìn, kwá fim bu pyìr sa.

² Tàma-à níng aning tib pìkyinn ná àjirà aning shi shuná á dunyaru àràng barà Shìdun ri zìm. Kada aning sa bu-à bibai zyun-à mpìrká ri zìm níng bàna.

³ A sai-à wàrì, ning shi nonn hing, ning ri sa bu-à bibai, ning rii bàg gbìb-à mpìrká zyun-à yì fig Shìdun bàna níng ri bàg. Ning rii sa bu-à bibai kim kim, ning rii sa àyái, ning rii wa pyann shin, ning rii kàng àning, mi ri wib bukiká.

⁴ Mpìr asa bukiká ri sa mamaki barà tàma-à níng ning ri kwonn fig rag shinn ma big, mi ri sa fig rag bu-à bibai-à big ri sa níng bàna. I bu-à sa big ri swau ning shí.

⁵ Mpìr káníng má dang kyàr vinn rìg buká big sa sig. Bá dinya Kristi bu bibaiká big sa sig, ku zyun-à má wà kwonn mpìrká zyun-à shi sig ma yonki ma ká wu sig.

⁶ Bu-à sa Yesu yag dinya mpìrká zyun-à rì wu sig, big rì wà sig big kwonn níng jir àjwár níng, í jirà adìnbá aku shi wìm zu, abig shi àràng barà Shìdun shi sig.

Ayi Sa Swàm Ma Yar-à Shìdun Ya Sig Yi

⁷ Ayúnn-à nyàan fòr wà kó kai má vinn rìg, aning pànn shinn ná, aning shi àzír àjirà aning vig Shìdun.

⁸ Bu-à sà̀n kab sig bà̀na, aning zì̀m kó ni bidim pá̀r á pìkyinn ná ni wà̀ni, jir kai bà̀na sai-à ya zì̀m hing ba dìryí yá yafa ya ba dìryí.

⁹ Aning pà̀nn kyìnnká ma pìkyinn ñzyun.

¹⁰ Kó ni shi sig ma írì yar-à Shìdun ya sig ku. Kó ni aku zì̀g yar-à Shìdun ya sig ku ma aku sa shang jàuwá ma kà̀hi ma pìkyinn ñzyun.

¹¹ Mpìr-à ma ri dang jir Shìdun, aku dang jí̀r zyun-à bi sig mà byar Shìdun. Mpìr-à ma ri sa ya mpìrká bu, aku sa ma gbam-à Shìdun ya sig ku. Aning sa bu káníng àjirà abig swam yan Shìdun á jir shinn Yesu Kristi. Ku shi síg nì zyun-à mpìrká má swam yan ku hár kinn kinn. Ku shi síg nì zyun-à shi sig ma gbam hár kinn kinn. Aku shi àdòning.

Shwìn-à Mpìr Ri Wa Jirà Ku í Bu Kristi

¹² Jàumí big, kada aning gib kyinn á shwìn ùwài-à ning ri wa níng bà̀na. Bu káníng ri màg màg fig pìkyinn birná. Kada aning kyab rag í bu àpyú zyun dìg síg ning nì bà̀na.

¹³ Aning fig àjwár, jir kai bà̀na ning ri wa shwìn-à Yesu Kristi rì wa sig. Ná fig àjwár á sai-à Kristi má sa sà̀n ya ning.

¹⁴ Aning fig àjwár á sai-à mpìrká ma swau ning shí jirà ning ri bàg Kristi. Wàníng tàg sig rag, gbam Awun Shìdun shi sig á dìrná ni.

¹⁵ Kada mpìr zyun áyauná ni aku wa shwìn jirà ku í mpìr agban kì, kó mpìr ajwú, kó mpìr-à ri sa swàm bu-à bibai, kó mpìr-à ri pìm kù kà á jí̀r.

¹⁶ Wà ning ma ri wa shwìn jirà ning í bu Kristi, kada aning fig àzunái bà̀na, ama aning sa Shìdun

ísoko wà barà big ri bar ning rag ning í bu Kristi níng.

¹⁷ Ayúnn-à màg rìghing wà bá wà rag kwonn-à. Bá wà jag ma mpìrká zyun-à ri bàg Shìdun. Wà ba wà jag rìg kwonn-à níng ma mpìrká ri bàg Shìdun, ká zyun-à ri bàg fig jir Shìdun bàna níng, bigbá má shi áshinn rà?

¹⁸ Jir Shìdun dang sig rag,
 “Shi sig ma shwìn wà mpìr òsàn má wìm zu.
 Wà má àdòníng, bu-à má sa ma mpìrká zyun-à ngàng jir Shìdun, mi ri sa bu-à bibai níng, í kai rà?”

¹⁹ Mpìrká zyun-à Shìdun ma zìm síg nì rag abig wa shwìn, abig bir pìkyinnbá á byar Shìdun àsàin-à màm sig big, zyun-à ri sa swàm ma bu-à ku dang sig, abig shi sa bu-à òsàn.

5

Aning Myàng Kwonn Ma Mpìrká Bu Shìdun

¹ Mì zyun-à mì í àgbam ma shinnmí, mì ri ba ya àgbamká áyau mpìrká ri bàg Yesu. N myàng hing Kristi ma zumí, ku rì wa hing shwìn. Sai-à kwa kàng bi hing, kwá sinn mì n shi mpìr ùwài àràg ku.

² Aning myàng kwonn ma yanká bu Shìdun zyun-à shi sig mà byarná nì àràg barà aza àdùnká ri myàng kwonn ma àdùnbá níng. Aning sa swàm ná ma pìkyinn nì zyun, kada a mpìr sinn kà ning ma gbam bàna. Shìdun ri zìm aning sa ma azìmná. Kada aning zìm íri bàì bàna, ama aning sa àtùtwài aning sa swàm.

³ Kada aning tàg gbam á shinn mpìrká zyun-à shi sig á mìr barná ni níng bàna. Ama aning tìya big gbìb òsàn á bar shuná ni.

⁴ A sai-à Yesu kùr aza àdùnká ma mìr gbìb zu hing, ná dìg bu kàm shinn òsàn níamá zyun-à má kor fig ákor bàna.

⁵ Ning sukáká, aning wib jir àgbamká zyun-à shi sig á pyànn ná ni. Ning bidìm pàr aning sìnn kàng shinn ná ásim, aning sa ya bar dìrná bu-à òsàn. Shìdun ri zìm fig mpìr-à ri gbar dù nann shinn bàna, ama ku ri sa ya mpìrká zyun-à ri wib mpìrká bu-à òsàn.

⁶ Aning gbar dù nann zu shinn á pyànn Shìdun ni bàna, ku àsàin-à shi sig ma gbam níng, ku í àsàin-à má gbar dù nann zu ning á wai á sai-à ku ri zìm.

⁷ Bu-à ma ri wa kyinn ná bidìm pàr, aning fim ya Shìdun, jir kai bàna ku í àsàin-à ri myàng kwonn ma ning bidìm pàr.

⁸ Aning tib pìkyinn ná, aning shi àzír, jir kai bàna azíbná Shaitan ri kyann kyann àràg í wiyir zyun-à ri yàn kyann mpìr-à kwá pànn zwam.

⁹ Aning ngàng ku, aning sar gbam wàni á pìkyinn birná ni, jir kai bàna jàuná big, ká ri bàg Yesu nìnànn níamá á jànn-à ni ri wa írì shwìn-à ning ri wa níng.

¹⁰ Shìdun í mpìr-à ri sa bu òsàn, ku bar sig ning jirà aning jùn kwonn ma Kristi hár kinn kinn, sai-à na wa hing shwìn títi níamá, ku ma shinnwá kwá zìg zu rìg shwìn ná, kwá pànn gbam ning, má ya ning gbam.

¹¹ Kwá ná nì kùr á shinn kó ni bidìm pàr hár kinn kinn. Aku shi àdòníng.

Bitrus Bib Kà Big

¹² Mì ri ba ya ning àkìm wasika zyun-à yi ma Silas ba sig, ku zyun-à yi ri myàng ku, ku í wunzà yí zyun-à ri bàg Yesu. Mì ri gbar gbam ning òr, mì ri dinya ning rag wà níng í bu òsàn bu Shìdun àjai. Aning sar gbam áni wàni.

¹³ Uwà zyun-à shi sig mà Babila, zyun-à Shìdun shig zu sig ma ning níng, ri bib kà bì ning, kwonn ma wùn mí Markus tinn.

¹⁴ Aning bib kà ba òr ná bidim pár, aning kàm pànn ba òr ná.

Shìdun aku ya ning pikyinn na tag, ning ká zyun-à ning í bu Kristi.

Jibu
Jibu: Jir Shidun (New Testament)

copyright © 2019 Wycliffe Bible Translators, Inc.

Language: Jibu

Contributor: The Nigeria Bible Translation Trust

All rights reserved.

2025-05-06

PDF generated using Haiola and XeLaTeX on 5 May 2025 from source files
dated 6 May 2025

a1139895-fa13-5ff1-8c00-a8ad25fcfa2f